

- अमेरिका रा उपराष्ट्रपति जे.डी. वेन्स जयपुर मांय कारोबारी सम्मेलन ने सम्बोधित कीना- भारत अर अमेरिका बीचे निवेश, ऊर्जा अर रक्षा हलका समेत न्यारी-न्यारी भागीदारियां माथे जोर दीनो।
- जम्मू-कश्मीर रा पहलगाम मांय सैलानियां माथे आतंकी हमलो-गृहमंत्री अमित शाह आला दर्जा री मीटिंग बुलायी।
- प्रधानमंत्री नरेन्द्र मोदी टोंक जिला रा पीपलू ब्लॉक रा आंगनबाड़ी केन्द्रां मांय व्ह्या सुधारां री सराहवणा कीनी।
- विश्व पृथ्वी दिवस रे मौके वनमंत्री संजय शर्मा कुदरत ने बचावण अर पौधा रोपण री अपील कीनी।

000

अमेरिका रा उप राष्ट्रपति जे.डी. वेन्स कह्यो है के ई सदी रो आवतो बगत भारत अर अमेरिका रा कारोबारी रिश्तां माथे निर्भर करे है। वे आज जयपुर मांय राख्खी ज्या कारोबारी सम्मेलन मांय बोल रह्या हा। अमेरिका रा उप राष्ट्रपति कह्यो के अमेरिका अर भारत कारोबार ऊं जुड़ी बातचीत सारु आधिकारिक तौर ऊं शर्तां तैय कीनी है, जो दोन्यु देशां बीचे रोडमैप तैयार करे है। श्री वेन्स कह्यो के अमेरिका रा राष्ट्रपति डोनाल्ड ट्रंप री टैरिफ पॉलिसी री आलोचना करी जा रही है, जद के वे संतुलित कारोबार रो माहौल बणायो है। वे कह्यो के भारत रक्षा हलका मांय अमेरिका रो सब ऊं नजदीकी अर भरोसेमंद साझेदार है। उप राष्ट्रपति जे.डी. वेन्स कह्यो के अमेरिका भारत ने हिफाजत ऊं जुड़्या विश्व स्तर रा साज-ओ-सामान देवण री मंशा राखे है अर भारत अर अमेरिका बीचे ऊर्जा रा हलका मांय भागीदारी री घणी संभावनावां हैं। श्री वेन्स भारत मांय नुवा घर बणावण अर जीवन स्तर बेहतर बणावण सारु सुबीता विकसित करण रा हलका मांय ई भागीदारी माथे जोर दीनो।

.....

उप राष्ट्रपति वेन्स आज भारतीय मूल री जोड़ायत उषा चिलुकुरी वेन्स अर तीन बच्चां सागे जयपुर कने आमेर रा किला अर दूजी ऐतिहासिक ठोड़ां रो दौरा कीनो अर वां ने निरख्या। वे आं री सुंदरता अर वास्तुकला री सराहवणा कीनी। आमेर पूगण परां वां रो परम्परागत राजस्थानी अंदाज मांय स्वागत करी ज्यो। आमेर महल मांय मुख्यमंत्री भजनलाल शर्मा अर उपमुख्यमंत्री दिया कुमारी अमेरिका रा उपराष्ट्रपति री अगुवानी कीनी। श्री वेन्स रो राज्यपाल हरिभाऊ बागडे, मुख्यमंत्री भजन लाल शर्मा अर उद्योग मंत्री कर्नल राज्यवर्द्धन राठौड़ सागे ई मुलाकात रो कार्यक्रम है। श्री वेन्स रो काल पिरवार सागे आगरा जावण अर दोपहरां ताई पाछा जयपुर आवण रो कार्यक्रम है।

000

जम्मू-कश्मीर रा अनंतनाग जिला मांय पहलगाम कने बैसरन जंगलात हलका मांय आज आतंकवादी वठे सैर-सपाटा सारु आया सैलानियां माथे अंधाधुंध गोळियां चला दीनी। वारदात मांय दो सैलानियां री मौत व्हे गयी अर चार जणां जख्मी व्हे ग्या। जख्मी लोगां रो वठे रा जिला अस्पताल मांय इलाज चाल रह्यो है। हिफाजती दस्ता हलका री घेराबंदी कर र तलाशी अभियान चला रह्या है। हालात ने ध्यान राखता थकां गृहमंत्री अमित शाह आला दर्जा री मीटिंग बुलाई। वे पहलगाम सारु रवाना व्हे रह्या है। प्रधानमंत्री नरेन्द्र मोदी ई हमला री सोशल मीडिया रे ज़रिए करड़ी निन्दा कीनी है।

000

केन्द्र सरकार राज्यां अर केंद्र रा राज वाळा प्रदेशां ने घणी ज़ोरदार गर्मी रा हालात मांय मजूरां री हिफाज़त ऊं जुड़्या जतन तुरत सारू करण री राय दीनी है। केन्द्रीय श्रम अर रोजगार मंत्री मनसुख मांडविया नई दिल्ली मांय खबरनवीसां सागे बातचीत करता थकां कह्यो के ई बाबत वां रो मंत्रालय राज्यां अर केंद्र रा राज वाळा प्रदेशां रा मुख्य सचिवां अर प्रशासकां ने खत लिख्यो है। वे नौकरी देवण वाळां, कारोबारियां अर निर्माण कंपनियां ने मजूरां सारू हीटवेव ऊं बचाव रा उपाय लागू करण रा हुकम दीना है।

000

संघ लोक सेवा आयोग सिविल सेवा परीक्षा 2024 रा नतीजा रो ऐलाण कर दीनो है। आयोग नियुक्ति सारू एक हजार नौ उम्मीदवारां रा नाम री सिफारिश कीनी है। आं मांय 725 पुरुष अर 284 महिलावां शामिल है। ई परीक्षा मांय शक्ति दुबे अव्वल रही। यूपीएससी लारला साल सितम्बर महीना मांय लिखित परीक्षा अर ई साल जनवरी ऊं अप्रैल बीचे साक्षात्कार लीना हा।

000

प्रदेश भाजपा मुख्यालय जयपुर मांय आज वक्फ सुधार जनजागरण कार्यशाला राख्यी ज्यी। भाजपा रा प्रदेश अध्यक्ष मदन राठौड़ री सदरत मांय व्ही ई कार्यशाला मांय वक्फ कानून मांय बदलावां री जाणकारी दीरीजी। ई मौके श्री राठौड़ कह्यो के वक्फ सम्पत्तियां ऊं मिलण वाळी रकम मुस्लिम महिलावां अर समुदाय रा भला सारू खर्च करी जावेला।

000

प्रधानमंत्री नरेंद्र मोदी टोंक जिला रा पीपलू ब्लॉक रा आंगनबाड़ी केंद्रां माथे बच्चां री माप दक्षता मांय सुधार री सराहवणा कीनी है। आं केन्द्रां माथे टाबरां री लम्बाई अर वज़न री माप दक्षता मांय 99 फीसदी ऊं बत्तो सुधार आयो है। श्री मोदी सिविल सेवा दिवस रे मौके काल नुवी दिल्ली मांय राख्यी ज्यी जळसा मांय आकांक्षी ब्लॉक कार्यक्रम रा तैत पीपलू ब्लॉक मांय व्ह्या गुणात्मक सुधार री सराहवणा कीनी। टोंक री जिला कलेक्टर सौम्या झा बतायो के आ उपलब्धि हासिल करण मांय करीब दो साल लाग्या। उपखंड रा आंगनबाड़ी केंद्रां मांय शौचालयां री उपलब्धता चार फीसदी ऊं 100 फीसदी करी ज्यी, जदके पीवण रा पाणी री पहुँच ई सगळां ताई व्ही अर स्कूलां रा बुनियादी ढांचां मांय सुधार करी ज्यो।

000

प्रधानमंत्री नरेन्द्र मोदी आज सऊदी अरब रा दो दिन रा दौरा सारू पूग्या। बतौर प्रधानमंत्री श्री मोदी रो सऊदी अरब रो ओ तीजो दौरा है। प्रधानमंत्री मोदी सऊदी अरब रा क्राउन प्रिंस मोहम्मद बिन सलमान सागे मुलाकात कीनी। इण ऊं पैली श्री मोदी कह्यो के प्रवासी समुदाय, दोन्यू देशां बीचे सांस्कृतिक अर मानवीय रिश्तां ने जीवंत सेतु रा तौर ऊं मजबूत करे है।

000

आज विश्व पृथ्वी दिवस रे मौके न्यारा-न्यारा जागरूकता कार्यक्रम राख्यी ज्यी। ई मौके नई दिल्ली मांय राख्यी ज्यी 'पृथ्वी बचाओ' सम्मेलन रो गृह मंत्री अमित शाह उद्घाटन कीनो। केन्द्रीय सड़क परिवहन मंत्री नितिन गडकरी अर पर्यावरण मंत्री भूपेंद्र यादव ई रा अलग-अलग सत्रां ने संबोधित कीना। प्रदेश मांय ई विश्व पृथ्वी दिवस रे मौके केई कार्यक्रम राख्यी ज्यी। डूंगरपुर री स्कूलां मांय जनता मांय जाग जगावण रा कार्यक्रम राख्यी ज्यी अर केई होडां व्ही। बांसवाड़ा मांय विद्यार्थी जल, जंगल अर पर्यावरण ने बचावण रो संकल्प लीनो। बाड़मेर मांय विद्यार्थी मानव श्रृंखला बणा र धरती री हिफाज़त रो संदेश दीनो। पाली मांय पृथ्वी दिवस रे मौके निबंध अर चित्रकला री होडां राख्यी ज्यी अर पौधा रोपण अर श्रमदान रा कार्यक्रम व्ह्या।

भरतपुर जिला रा केवलादेव राष्ट्रीय उद्यान मांय कार्यशाला राख्यी ज्यी। झालावाड़ मांय परिंडा बांधी ज्यी। वनमंत्री संजय शर्मा सीकर मांय खबरनवीसां सागे बातचीत करता

थकां कह्यो के सरकार लारला साल सात करोड़ 22 लाख ऊं बत्ता पौधा रोप्या अर ई दफा और बत्ता पौधा रोप्या जावेला।

000

सूचना अर प्रसारण मंत्रालय री ओर ऊं देश रो पहलो दृश्य श्रव्य अर मनोरंजन शिखर सम्मेलन—वेब्स मुंबई मांय एक ऊं चार मई ताई राख्यो जावेला। वेब्स कंटेंट बणावण वाळां, दिमागी बूता अर तकनीकी नवाचार रा हलका मांय काम करण वाळां ने वैश्विक मंच मुहैया करावेला। आं मांय रेडियो, टी.वी., फिल्म, एनिमेशन, डिजिटल मीडिया, एआई अर वीआई शामिल है। जोधपुर रा एनिमेशन फिल्म मेकर रोहित सांखला ने ई वेब्स मांय शिरकत करण सारू चुण्णी ज्या है। रोहित कह्यो के ई रे ज़रिए वे वां री रचनात्मकता ने और ऊंचाई देवण री पूरी कोशिश करेला।

000

चित्तौड़गढ़ जिला रा चित्तौड़ी खेड़ा गांव ऊं आज करीब डोढ़ हजार किलोग्राम नकली घी बरामद करी ज्यो। एस.पी. सुधीर जोशी बतायो के ओ नकली घी अलग-अलग ब्रांड रा नाम ऊं चित्तौड़गढ़ जिला रे बाहर बेच्यो जा रह्यो हो। मौका ऊं दो टाबर मजूरां ने ई पकड़ी ज्या।

000

आईपीएल क्रिकेट होड़ रा तैत आज लखनऊ सुपर जायंट्स अर डेल्ही कैपिटल्स बीच मुकाबलो व्हेला। ओ मैच अब ऊं थोड़ी देर पछे साढ़े सात बज्यां लखनऊ रा अटल बिहारी वाजपेयी एकाना क्रिकेट स्टेडियम मांय सारू व्हेला। डेल्ही कैपिटल्स री टीम हाल ताई अंक तालिका मांय दूजी अर लखनऊ सुपर जायंट्स री टीम पांचवीं ठोड़ माथे है।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय ई दीतवार 27 अप्रैल ने विचार बतावेला। आ ई कार्यक्रम री 121वीं कड़ी व्हेला। ई सारू आप ई 25 अप्रैल ताई सुझाव भेज सको हो।

000